



Бұқаралық спорт та АҚСАП ТҮР

Спорт саласына түбегейлі реформалар қажет екенін Токио Олимпиадасы дәлелдеді. Барлық жауапкершілікті кәсіби спортқа жүктеп, реформа күтіп, қол қусырып отыруға болмас. Бұқаралық спорт – спорт саласының ең маңызды іргетасы. Оны дамытпай, ел спорты Олимпиада тәрізді белестерді бағындыру мүмкін емес. Дегенмен халқымыз спортты серік етіп жүр ме? Токиода ақсаған спортшыларымыз секілді бұқаралық спортымыз да аяғын нық баса алмай жүргендей.



ОЛИМПИДАЛЫҚ СПОРТКА ҚАРЖЫ ШЫҒЫН

Еліміз олимпиадалық спортқа мол көлемде қаржы бөледі. Мәселен, Мәдениет және спорт министрлігі ұсынған дерек

бойынша, Қазақстан спортшылардың жаттығуына жыл сайын кемінде 10 миллиард тенге шығындайды. Ал Токио Олимпиадасы жақындаған тұста, былтыр еліміз осы мақсатта 15 миллиард тенге бөлген екен. Бірақ осыған

қарамастан биылғы Олимпиадада спортшылардың көрсеткіші қандай болғанын білеміз. Мол қаржыға қарамастан, ел құрамасының нәтижесі тым нашар болды.

8 >>

Бекіре өсіретін зауыттардың халі мүшкіл



Елімізді қара алтынмен бірге қара уылдырығымен тамсандырып, әлемге әйгілі еткен балық саласының бүгінгі ахуалы оншалықты жақсы емес. Жайық өзенінің тартылуы, балықтардың тағылықпен аулануы, уылдырық шашатын жерде су болмай, жағаға шығып қалуы әрі белгісіз себептермен уланып жатқаны – ең үлкен күрделі мәселеге айналды. Балықты сақтаудың бір ғана жолы бар, ол – уылдырықтан шабақ өсіріп, су айдынына жіберу.

Балық шаруашылығы саласында қызмет ететін мамандар уылдырықтан шабақ өсіріп, жыл сайын Жайық өзені мен Каспий теңізіне жібереді. Екі зауыттан кем дегенде 7 миллион шабақ жіберіледі. Жуырда екі зауыт дәстүрлі түрде мәлепел өсірген шабақтарын Жайық өзеніне жіберді. Дегенмен зауыттардың жайы мез емес. Ел Үкіметі қазірден назар аудармаса, зауыттардың жұмысы тоқтап қалуы мүмкін екенін мамандар айтып жатыр.

7 >>

БАҚЫТЫН БАСҚА ЕЛДЕН ІЗДЕГЕНДЕР



Тәуелсіздіктің 30 жыл уақыты ішінде қазақ даласында туып-өскен 4 миллионнан астам адам бүгінде әлемнің әр түкпірін кезіп кеткен. Бұл қазақстандықтардың жалпы санының 22 пайызынан асады. Яғни, туған мемлекетінен қоныс аударғандардың көптігі жағынан Қазақстан Сириядан (40 пайызға жуығы елден кеткен) кейінгі екінші орында тұр. Шам елінің жағдайы түсінікті, тұрғындары соғыстан бас сауғалай қашып, өзге жерден пана іздеп, босқынға айналған. Ал ешқандай соғыс жоқ, ың-шыңсыз бейбіт заманда Қазақстаннан мұншама жұрттың көшуіне не себеп?

АРКАДА ҚЫС ЖЫЛЫ БОЛСА, АРҚАР АУЫП НЕСІ БАР?

Қазақ топырағында дүниеге келгендердің бестен бірі қазір шетелдерден тұрақ тапқан. «Арқанда қыс жылы болса, арқар ауып несі бар?» демекші, мұның саяси-

экономикалық мәні тереңде. Әлбетте, бұл көрсеткіш 90-жылдардың басында тарихи Отанына ауа көшкен славян, еуропатектес халықтардың есебінен көбейіп отыр. Бірақ қалай дегенмен де, олар да бір кездері қазақстандық азамат атанып еді. Олардың біреу-

лері Одақ құлағаннан кейінгі аяғынан шатқаяқтап енді тұра бастаған жас мемлекеттің болашағына күмәнмен қараса, енді біреулері саяси-экономикалық жағдайдан қорықты.

(Жалғасы 6-бетте)

ҰЛТЫМЫЗДЫҢ ҰЛЫ ПЕРЗЕНТІН ҰЛЫҚТАЙ БЕРЕМІЗ

Абай шығармаларын елімізде ғана емес, шетелде де насихаттауымыз керек. Бұл туралы ел Президенті Қасым-Жомарт Тоқаев Twitter-де мәлімдеді.

«Бүгін – Абай күні. Біз ұлтымыздың ұлы перзентін ұлықтай береміз. Өйткені халқымыздың болмыс-бітімі, ділі, дүниетанымы оның шығармашылығында тұтастай көрініс тапқан. Абай шығармаларын елімізде ғана емес, шетелде де насихаттауымыз керек» деп жазды Мемлекет басшысы.

Колледж ұстазсыз қалмай ма?

Жалақы мәселесі – қоғамда жиі талқыланатын тақырып. «Педагог мәртебесі» туралы заң қабылданып, мұғалімдердің жағдайы да, жалақысы да көтеріліп, мәселе оң шешімін тапқандай. Керісінше, бұдан колледж мұғалімдері сырт қалып қойған секілді. Мектеп пен колледж мұғалімдерінің білім беру бағдарламалары ұқсас келетіндіктен, ендігі жерде олар да мектепте сабақ беруге ұмтылады. Мұндай жағдайда колледждеріміз мұғалімсіз қалып қоймай ма?

ЖЕКЕМЕНШІК КОЛЛЕДЖДІҢ ЖЫРЫ БАСҚА

Мәселен, Жанна Төлеубайқызы 10 жыл бойы Қарағанды гуманитарлық көпсалалы колледжінде жұмыс істеген. Еңбек еткен жылдары директордың тәрбие ісі жөніндегі орынбасары, кафедра

менгерушісі болған, әдістемелік нұсқау шығарып, кітап жазған. Кейіннен колледж жекеменшікке өткен соң жағдай өзгеріп сала берген деседі. Сөйтіп, педагог гимназияға жұмысқа тұрған екен. «Колледж жекеменшікке өтіп кетті. Жалақыны директор өзі белгілегендіктен, жыл сайын 10 мың

тенге ғана қосылатын. Мысалы, аталған колледжде әлі күнге жұмыс істейтін таныстарым 140-150 мың тенге алатынын айтады. Есептеп көріңіз, жоғары санатпен, 1,5 мөлшерлеменен осындай көлемде айлық алып жүр.

5 >>



Құмар АҚСАҚАЛОВ, Солтүстік Қазақстан облысының әкімі:

Майлы дақылдар өндірісінен көш бастаған өңірміз

Халқымыздың маңдай төрімен жеткен басты жетістігі, Тәңірдің бізге берген зор бақыты, баға жетпес мәңгілік құндылығымыз – ел Тәуелсіздігіне биыл 30 жыл толып отыр. Осы жылдар ішінде тәуелсіздіктің арқасында Солтүстік Қазақстан облысының қол жеткізген жетістіктері ауыз толтырып айтарлықтай. Тұрғындардың әл-ауқатын арттырып, өңірді жан-жақты дамыту бағытында атқарылған қыруар жұмыс туралы Солтүстік Қазақстан облысының әкімі Құмар Іргебайұлы АҚСАҚАЛОВ AIQYUN газетіне сұхбатында егжей-тегжейлі әңгімелеп берді.

4 >>

Жұмыс та, жұмыссыз да көп

Жұмыспен қамту орталықтарына жүгінетіндерге қарағанда жұмыс берушілер көбейген. Бірақ елдегі жұмыссыздар саны азаймай тұр. Өйткені жеке кәсіпорындарды есептемегеннің өзінде жұмыс орындарындағы тұрақсыздық пен қысқартуға ұшырағандардың саны өскен. Жұмыссыздықты жою үшін жасалған жоба қайда? Жыл сайын бөлінген қаржының қайтарымы бар ма? Жұмыспен қамту мамандары қандай уәж айтады?

ЖҰМЫСПЕН ҚАМТУ ЖОСПАРЫ

Үкімет басшысы жыл басында тұрақты жұмыс орындарын құру бойынша жұмысты жалғастыру үшін жалақы мөлшерін он пайызға арттыра отырып, жұмыссыз қазақстандықтардың санын азайту керек екені туралы тапсырма берді. Ол үшін қажетті құралдар мен қаражат та қарастырылып жатқаны айтылып, биыл жұмыссыздық деңгейі 4,9%-дан аспайды деген еді. Сондықтан Еңбек және халық-

ты әлеуметтік қорғау министрлігіне 1 маусымға дейін 2021-2025 жылдарға арналған «Еңбек» ұлттық жобасын енгізуді тапсырды. Сонымен қатар Ұлттық экономика, Еңбек және халықты әлеуметтік қорғау министрлігі және әкімдіктерге 1 шілдеге дейін өңірлік жұмыспен қамту карталарын әзірлеп, «Еңбек» жобасының іс-шараларын іске асыруды қаржыландыруды қамтамасыз етуге міндеттеді. Бағдарлама бойынша биыл 700 мың адам, жұмыспен қамтуында дағ-

рысқа қарсы Жол картасы бойынша 32 мың адамды жұмысқа орналастыру жоспарланған. Ал 440 мың адам бюджеттік инвестициялардың қатысуымен жүзеге асырылатын жобалар есебінен жұмыс табуы керек. Сөйтіп, биыл елімізде кадрларға қажеттілік 12,1 мың адам болған, бұл ретте орта және ірі кәсіпорындар 37 мыңға жуық бос жұмыс орнын ұсынуы қажет. Бұл үшін республикалық бюджеттен 104,2 млрд тенге бөлінді.

6 >>



Ақшаны жымқырғандар сотталды

Спорт және дене шынықтыру істері комитетінің бұрынғы қызметкерлері бас бостандығынан айырылды. Өңірдің Қылмыстық істер жөніндегі мамандандырылған ауданаралық сотының мәліметінше, ірі көлемде пара алған Спорт және дене шынықтыру істері комитетінің бұрынғы басшысы, оның экс-орынбасары және алаяқтық жасаған кәсіпкер сотталған.



«Белгілі болғандай, комитет орынбасары «О» мен ЖШС директоры «Б» алдын ала сөз байласып, 354 миллион тенге бюджет қаражатын жымқырған. Бұл қаражы негізінен Риддер қаласында 300 орындық республикалық мамандандырылған олимпиадалық резерв мектеп-интернат-колледжін салуға бөлінген», — делінген ақпаратта.

Ал Спорт және дене шынықтыру істері комитетінің экс-басшысы 2018 жылдың мамыры мен желтоқсан айлары аралығында ЖШС директорынан 35 013 881

тенге көлемінде пара және құны 13 миллион тенгелік автокөлік алған. Ол көлікті әйелінің атына аударып жіберген.

«Сот ісі барысында комитеттің экс-орынбасары мен кәсіпкер өз кінәсін мойындады. Ал комитеттің бұрынғы басшысы пара алмағанын алға тартқан. Алайда айыпталушылардың кінәсі куәгерлердің айтқандарымен және тиісті құжаттармен дәлелденді», — деп жазылған хабарламада.

Сот үкімі бойынша Спорт және дене шынықтыру істері комитетінің бұрынғы басшысы Қазақстан Қылмыстық кодексінің 366-бабы 2-бөлігімен 5 жылға, комитет басшысының экс-орынбасары ҚК-нің 361-бабы 4-бөлігінің 2-тармағымен 3 жылға және осыған дейін сотты болған бұрынғы кәсіпкер 7 жылға бас бостандығынан айырылды. Сондай-ақ олар мемлекеттік қызметте жұмыс істеу құқығын өмір бойына жоғалтты. Үкім әлі заңды күшіне енбеген.

М.ТӨЛЕУ

Екпе салдырып, пәтер ұтып алды



Маңғыстауда «Екпе салдыр да, пәтер ұтып ал» науқанының қорытындысы белгілі болды.

27 жастағы маңғыстаулық тұрғын Қайрат Қосаевқа 38-ші шағынауданда орналасқан 2 бөлмелі пәтердің кілті табысталды.

Женімпаздың айтуынша, вакцинанан ол ұтысқа қатысу үшін емес, өз денсаулығын күту мақсатында салдырған. Ол облыс тұрғындарының қазіргі эпидемиологиялық ахуалға салмақты қарап, екпе алуға шақырды.

«Ұйымдастырушыларға көп рақмет. Бастапқыда бұл науқанға сенген жоқпын. Қазір шынайы екеніне көзім жетіп отыр. Қуаныштымын. Жеке баспанам жоқ еді, енді ата-анам Ақтауға көшіп келгенде тұратын үйі лайын», — деді Қайрат Қосаев.

Ж.НҰРЛАН

Тұрғын үй бағасы қымбаттады

Жыл басынан бері қайта-лама тұрғын үй құны 16%-ға өсті.

LS агенттігінің мәліметінше, биыл шілдеде көпқабатты тұрғын үйдің бір шаршы метрі 270,4 мың теңгеден сатылды. Бұл 2020 жылғы желтоқсандағы бағамен салыстырғанда 16%-ға артық. Жылдық өсім — 24,9%.

Жаңа тұрғын үй бір айда 0,4%-ға, ал жыл басынан бері 9,7%-ға, бір шаршы метрі үшін 339,9 мың теңгеге дейін қымбаттады. Жалға берілетін тұрғын үйлердің бір шаршы метрі бір жыл ішінде 11,9%-ға, 1,8 мың теңгеге дейін қымбаттады. Жаңа тұрғын үй бағасы жыл басынан бері 8% өскен.

Сонымен бірге, Krisha.kz порталының 10 тамыздағы деректері бойынша Алматыдағы барлық



тұрғын үйдің бір шаршы метрінің орташа құны 516,3 мың теңге, Нұр-Сұлтанда — 383,3 мың теңге,

Шымкентте 337,3 мың теңге болған.

М. БАҚЫТЖАН

Мектепте «Әліппе» қайта оқытылады



«Әліппе» және «Букварь» оқулықтары Қазақстан мектептеріне қайта оралып жатыр. Бүгін Білім және ғылым министрі Асхат Аймағамбетов аппарат жиналысында оқулықтарды таныстырды.

«Бірінші қыркүйекте өтетін іс-шарада біз алғаш рет мектеп табыл-дырығын аттаған оқушыларға салтанатты түрде «Әліппе» оқулығын табыс етуіміз керек. Бұл — игі дәстүр. Аталған бағыттағы жұмысты уақытылы ұйымдастыру қажет. «Әліппе» — бүлдіршіндердің алғашқы оқулығы. «Әліппе» оқулығы әзірленіп, өңірлерге жеткізіліп жатыр. «Әліппе» ұлт ұстазы Ахмет Байтұрсынұлының әдістемесі негізінде жасалды», — дейді Білім және ғылым министрі Асхат Аймағамбетов.

Р. МІНӘП

Ақтөбеде жайылымның жартысы өртеніп кетті



Өңірдің Әйтеке би ауданында дала өрті өршіп тұр. Шаруалардың өртпен алысқанына екі тәуліктен асқан. Әуелі Әйке ауылы маңындағы жайылым жерлер отқа оранған. Артынша желдің екпінімен тілсіз жау Талдық, Қайрақты жағына қарай ойысқан. Дала әлі өртеніп жатыр.

Шаруалардың айтуынша, қазір жайылымның жартысы жанып кеткен, мал шығыны да бар. Тұрғындар аймақ басшылығы тезірек әрекет етпесе, жерімізден айырыламыз деп дабыл қағып жатыр.

— Ешкім қастандық жасап, өрт шығармаған. Бірақ жағдай қиын. Сақтап отырған 12 мың қыстық жайылымым күлге айналды. Менен басқа бірнеше шаруаның жа-

йылымы өртеніп кетті. 8 бас жылқымыз күйіп шалған. Бір үйір жылқымыз таппай қалдым. Ал жергілікті биліктен көмек жеткенше кеш болады, — дейді «Қонысбай» шаруа қожалығының басшысы Мұрат Сәтмағамбетов.

Ал жел айдап, лаулаған өртті тұрғындар өшірмек түгілі, жақындай алмай жатқан көрінеді. Ал бұл аумақта өрт жиі болатынын

білсе де, жергілікті билік жақын маңға өрт сөндіру бекетін салмаған екен.

2017 жылы дәл осы ауданда өрт болып, 2 адам қаза тапқан болатын. Бұл жолғы өрттің де зардабы мол болмақ. Себебі бұл өңірде өрттің кесірінен мал азығының тапшылығы болуы мүмкін. Әдетте Ақтөбе облысы қуаңшылықтан зардап шегетін Маңғыстау, Атырау облысы мен Арал ауданына жемшөп жөнелтіп, көмек беретін. Енді өңірдегі шаруалардың өздері зар илеп қалмаса игі.

М.ЖАЛҒАСҰЛЫ

Pfizer-ді күтпеңдер



Денсаулық сақтау министрі Алексей Цой Қазақстанда Pfizer вакцинасы жүкті әйелдер мен балалар үшін қолжетімді болатынын айтты. Сондықтан ол бұл екпені күтпей, басқа вакциналарды ала беруге кеңес берді.

«Бастапқы кезеңде, қазан айында Pfizer вакцинасы тек балалар мен жүкті әйелдерге қолжетімді болады. Сондықтан бұл вакцинаның көп күтудің керекі жоқ. Қазір барып екпе жасап берген жөн. Бір апта ішінде бізде

тағы бір вакцина болады. Оны Дүниежүзілік денсаулық сақтау ұйымы мақұлдаған. Осы орайда, бұл вакцинанан да салдыруға мүмкіндік бар», — деді Алексей Цой.

Бұдан бұрын хабарланғандай, Денсаулық сақтау министрі Қазақстанда коронавирустан вакцинанан қайталап егудің мерзімін де қоса атап өтті.

«Қазақстанда вакциналау ақпан айынан бастап жүргізілгендіктен, мерзімді пысықтап жатырмыз. Адамдардың басым бөлігі маусым-шілде кезеңінде екпе алды. Осы орайда олардың

ағзасындағы антиденелер әлі де бар, оның деңгейі де жоғары. Сондықтан екінші дозаны алғаннан соң шамамен 9 айдан кейін күнтізбеге енгізіледі. Қазір әріптестермен осы мәселені қарастырып отырмыз», — деді А. Цой.

Айта кетерлігі, Президент Қасым-Жомарт Тоқаев қазақстандықтарға Pfizer вакцинасын қолжетімді етуді тапсырды. Қазақстан Pfizer компаниясымен вакцинанан жеткізу бойынша алдын ала келісім жасалды.

Айбике ЖАНАСЫЛ

Нью-Йоркте көрсетілетін фильм



«Жаным, ты не поверишь» фильмі New York Asian Film Festival кинофестивалінде көрсетілмек. Кинофестивальдің ерекшелігі онлайн форматта да, офлайн режимде де өтеді. 6-22 тамыз аралығында Линкольн орталығында 60-тан аса түрлі жанрдағы фильмдердің көрсетілімі болады.

Режиссер Ернар Нұрғалиевтің «Жаным, ты не поверишь» картинасының тарихы жас жұбайлар арасындағы қарапайым отбасылық жанжалдан басталады (Данияр Алшынов пен Әсел Калиева). Жағдай шиеленісе

бастағанда, Дастан есімді бас кейіпкер (Азамат Маркленов, Ерлан Пірімбетов) бизнесмен және учаскелік полиция қызметкері балық аулауға шығады. Күтпеген жағдайлар бұл күнді қанды оқиғаға айналдырады.

Режиссердің айтуынша, бұл — күлкілі әрі қызық кино. «Бір жағынан авторлық кино, бұған дейін түсірілген фильмдерге ұқсамайды. Екінші жағынан, көрермен күтпеген түрлі оқиғаларға толы. Музыкасы да бөлек, жұлдыздар да қатысқан әзілге толы фильм. Сценарийінде де еркіндік бар. Бұл фильм көрермен тарапынан да жоғары баға алды», — дейді режиссер.

Гүл БЕКЗАТ

